


POETI
DEL CENTRO CULTURALE
PEPPINO CALECA





CRISTOFORO ANCONA

LU CARRUBBU

Quannu lu suli àvutu fà calùra,
c'è 'n'arvulu chi teni li rami longhi e larghi.
Pussenti iddu è d'aspettu,
pari quasi un casamentu.

Viaggiatura, cavaleri e puvureddi
sutta li sò pampini trovavanu giuvamentu.
Li picurara, abbivirati li pecuri,
sutta d'iddu à lu friscu li tinianu
e pi li vacchi quannu tempu di musca era,
fertiliziu megghiu p'arripararisi nun ci nn'era.


A tempu di furmentu poi,
assai cuntenti li metitura eranu,
d'iddu a lu siminatu vicinu aviri,
lu manciari a li sò rami appizzavanu,
e l'acqua a li sò peri mittianu.

Quannu prescia pì nasciri 'na criatura avìa,
li fimmini, chi a lu siminatu li mariti aiutavanu,
primurusi a lu friscu currianu,
pi 'na giuvina matri dari succursu.

Li piciriddi cuntenti pi li sò frutti eranu
picchè decotti e calameli cci facianu,
e cu li coccia di li sò simenzi,
li cosi assai priziusi ci pisavanu.

Pi cuntinara d'anni l'omu sinnì usufruiu
pi scanuscila 'nta li nostri jorna.





GIOVANNI ARENA

UN PINSERI HAIU..

Picchi c'è sta cosa dintra di mia?
nun la capisciu. Vattinni!
Si na ragnatila irta e spinusa
mi cunti sulu tristizzi e surprusa.

Mi pigghi di pisu, mi susi e a lu ventu mi jetti...
Ma picchi a mia? Chi mali ti detti?
Eu vogghiu l'amuri, li stiddi taliari,
pinsari a la vita, pinsari a lu mari.
Ma tu m'attuppi la vucca e m'ammucci lu celu
dimmi cu si! Tintu pinseri...

Forsi la curpa è di lu munnu infami
chi vidi di futtiri pi saziari la fami
di vani ricchizzi e fitusi picciuli.
Li me cumpaisani, fimmini e masculi
su muti, siddiati, 'un sannu chi fari
ma pensa a la saluti, pensa a campari...
Picchè fumari, viviri e scappari
di lu nostru paisi, ch'avissimu a sarvari...

Lu munnu fa schifu? Appostu! Canciamu,
sturiamu, sbrazzamuni e n'arripigghiamu.
S'haiu a diri la verità, 'un ci criu mancu eu
ma 'un ni scurdamu
chi ni talia Diu.





LUCIA BARBERA

A ME PATRI...

Santu t'avissiru a fari!
Lassasti tuttu pi mia e me soru..
omu ginirusu di lu cori d'oru.
Lassasti vizi, divertimenti e tranquillità
pi farini crisciri nta la filicità.

Patri meu, beddu si 'un ti canuscissi
lu stessu t'amassi
pi lu to cori, anima e pinseri..
pi la to buntà, panza e surrisi..
pi li to' canzuni chi rallegranu li visi.

Oh patri chi mi criscisti sulu..
senza mughieri nè parenti
mi 'nsignasti tanti cosi:
mi 'nsignasti a taliari li cosi beddi,
li stiddi,
mi 'nsignasti ad amari e fari lu beni..
Fusti lu me maestru, me patri e matri..
Fusti tuttu, si tuttu.
Si lu me ancilu tirrenu chi mi pruteggi.





BERNARDO CAROLLO

L'ARBA RI DUMANI

Taliannu l'orizzunti, all'agghiurnari,
immiscu n'ta un ciatu spiranze e pinseri,
mentri la scumazza ri li unni abbrazza li scogghi
e lu mari ioca cu la rina ancora fridda.
Respirannu du ventu, ri primu matinu,
mi sentu ranni, chiu ranni ri stu Munnu,
e quannu lu sulu quaria stu cori alluccutu
pensu puru chi tuttu chistu m'apparteni.
Ma riflittennu bonu, a menti sirena,
m'addugno chi tuttu chiddu c'aiu n'tunnu,
la rina, lu scrusciu ri l'acqua, lu suli, li unni,
esistinu da prima chi l'omu misi peri n'terra.
Allura capisciu chi sugnu sulu un puntu
n'ta st'universu di culura, di cosi beddi,
e proiu li manu, ma un strinciu nenti,
picchè propriu eu appartegnu a tuttu chistu.
Li negghi, lu cielu, si riflittunu rintra st'occhi
allungannu li cunfini, portannumi luntanu,
rintra di ricordi chi lu tempu prova a straviari
e chi n'ciniriscinu l'arma cu m'pruvvisi vampati.
Taliannu la luna, chi s'affaccia lenta a lu scurari,
mi sentu n'ta un versu ri puisia iuntu a la so fini,
e n'ta da notti nimica chi cummogghia tutti cosi
aiso l'occhi n'cielo priannu l'arba ri dumani.





SALVATORE DOMINGO

L'OMU QUANNU E' SPERTU

L'omu chi è spertu assai nun vali nenti,
essennu bonu è chiamatu 'gnuranti,
havi a essiri semplici e prudenti
e cu l'amici soi sempri uquallianti
e nun aviri superbia putenti,
nun essiri mischinu e pitulanti,
la fratellanza cu tutti li genti
ed è aduratu muggghi di li santi.

L'omu, quann'è vigliaccu e raditicu
nun è taliatu pi un omu simpaticu,
poi, quannu ti fa lu spertu e lu puliticu,
pi ogni modu so pari antipaticu
c'è chiddu latru ed eu puru lu criticu,
ci portu odiu e un pocu di rammaricu
e pi difisa sua cu nuddu liticu,
mi tegnu arrassu e mostru diprumaticu.

L'omu precisu e di modi chi vali,
buntà n'havi a pusseriri un zimmili,
pi diri veru na cosa reali,
massaru d'addumaricci cannili,
ma si fa mancia e dormi di maiali,
è tinta malatia l'omu ch'è vili,
nuddu rimediù c'è pi stu so mali,
cu midicini di qualsiasi stili.





ANGELICA FERRANTELLI

STIDDUZZA MIA

Sta stidda chi la notti mi cunsola,
chi nun mi fa parrari sempri 'nvanu,
mi 'nsigni comu a latu a tia si vola
nta un celu dunni cadu e dopu acchianu?

Stidduzza, ogni notti t'haiu taliatu:
mai na palora, sulu luci haiu avutu;
macari eu t'avissi sempri a latu,
ti mettu cca 'n sacchetta e nun t'astutu.

Accussì, quannu la tristizza avanza,
quann'è chi 'un haiu a nuddu a cu' parrari,
'n silenziu eu ti nesciu nta sta stanza
pi a latu a mia putiriti addumari.

E allura quannu tuttu pari nenti,
sta luci dintra un cori si vattia,
si megghiu tu! Di certu nun c'è genti
accussì bedda e vera comu tia.





STEFANO FERRANTELLI

VENTU... E NEGGHI

Ventu, chi strazzi li nuvuli 'n celu,
eu taliannuti, mi smaceddu e dicu,
ma comu fai a sbattiri stu velu?
E' granni, 'mmensu, ma a tia pari nicu.
Chi cu un ciusciumi tu li fai vulari
di na parti all'atra di lu mari.

Tutti sti negghi, appannanu la menti,
mi dunanu na gran malincunia
e tornanu a affacciari li turmenti
di l'esistenza, di la vita mia.
Ma tu ventu, pussenti e assai 'mpurtanti,
via la negghia, lu sulì porti avanti.

Allura, lu me cori si fa letu,
torna sirenu lu me sintimentu,
a st'anima nun dugnu nuddu vetu,
pi putiri turnari chiù cuntentu.
Tu ventu... chi firri pi l'universu,
grazii! Senza di tia eu fora parsu.





ANTONINO FONTANA

CASTEDDAMMARI MEU

Casteddammari si lu me paisi
chi eu nascivi cca distinu vosi,
quannu a stu munnu li me' peri misi,
mentri criscia spirava tanti cosi.
Cca la me giuvintù passavi 'n crisi,
quannu chi mori corpu meu arriposi
cca li muntagni cu giummari e disì,
hannu statu pi mia jardu e rosi.

A tia, paisi meu Casteddammari
li dedicu sti misiri palori,
dunami quantu basta pi campari,
nun t'addumannu ricchizzi e trisori.




Chi sugnu figghiu to nun ti scurdari
quannu cessa di battiri stu cori
l'anima mia a Diu speru di dari,
a tia ti lassu stu corpu chi mori.

Casteddamari meu, paisi beddu,
ti penzu e nun ti pozzu mai scurdari
lu granni gurfu, l'anticu casteddu,
li varchi a vela, li vecchi lampari.
Di rizza paratu lu marinareddu,
partia la sira pi jiri a piscari,
tutta la notti fora, aggragnateddu,
turnava a l'arba prima d'agghiurnari.

Mentri lu riccu chi avia lu cappeddu
li megghiu pisci si putia accattari,
lu chiaccu era pi lu puvireddu
chi nun avia pani pi manciari.
Partennu a l'arba cu un zappuneddu
faccia simani e misi di zappari;
mentri chi ora cu' è picciutteddu
vulissi grana senza travagghiari.





GIUSEPPE FURCO

ATTENTI A LI 'NGAGGHI (INTERNET)

Bedda signura cerca un sigitariu,
un omu chi sarà abbastanza seriu,
nun ci 'nteressa s'è beddu o s'è lariu,
si chiama Peppi, Vicenzu o Saveriu;
cu sta crisi, pinsannu a lu salariu
arrivau puru un pilota d'aeriu!
Tanti disuccupati: un cintinariu,
nta un casali cu musica steriu.


Ma soccu c'era darrè lu sipariu
chi nun turnava né Ciccio o Valeriu?

Na granni villa furnita di scali,
chi si sbuccava darrè d'un curtili,
cu stuzzichini e acqua minirali,
'ncuntrannu fimminuna a granni stili.

Strana jornata curiusa e fatali
comu pecuri munciuti a varili,
rischiannu di finiri nta 'u giornali
pi la vulgarità quasi 'ncivili.

Nun canuscennu dda porca industriali
c'affaccia e dissi: "Fu pesce d'aprile!"





GIUSEPPE GERBINO

VITA CAPRICCIUSA

La vita certi voti è capricciua,
ti fa suvicchiarri a mai finiri:
pari na strata china di pirtusa,
chi cerchi di scansari e nun ti firi.


Ci piaci spissu fari la smurfiusa,
ti fa lu leccu e poi, ti fa 'nfuddiri;
ti dici chi di tia è assai dilusa,
forsi lu fa pi fàriti riagiri...

Ed eu riagisciu e mannu a ddu paisi
lu munnu 'nteru e tuttu l'universu
di sta riazioni cu' ni fa li spisi

sugnu eu, comu va va è tempu persu,
picchè soccu è chi vogghiu, li pritisi
su' troppu, e mi va tuttu a lu riversu...

Allura soccu fazzu? Dicu: "Pregu,
fai soccu voi... ci ridu e mi ni fregu!





MARIO MAIMONE

SI TU FUSSI


Si Tu fussi lu sulì a lu me celu,
matruzza mia chi lustru avissi a fari!
Si di lu capu tò, eu fussi un velu,
parissi Tu Madonna 'nta l' altari!

Si Tu fussi lu scogghiu, ed eu lu mari,
cu l' unni mei, carizzi chi ti dassi!
E si eu fussi varca, e Tu lu mari,
'nta l' unni toi, filici c' affunnassi!

Si fussi eu la terra, e Tu li ciuri,
stu munnu fussi chinu di profumi!
Si 'nta lu cori tò ci fussi amuri,
la vita mia s' inchissi comu un ciumi!

E addivintassi celu, sulì, mari!
E puru varca, scogghiu, terra e ciuri!
E poi carizzi, e velu, e poi n'altari!
Pi fari assai chiù granni lu tò amuri!






GIO' MARGAGLIOTTI

**COMU MI SENTU E
SOCCU SUGNU**

Mi sentu comu na cosa fora tempu
mi sentu comu un pisci fora l'acqua
mi sentu comu na foggia ammuttata di lu ventu
 eppuru un omu sugnu...
 chi avi l'aricchi pi attintari
 la vacca pi parrari
 la menti pi pinsari
 si... vecchiu sugnu
 ma n'aiu cosi di cuntari.
Criscivi 'n menzu li malannati
 agghiurnava e scurava
 e lu pani mi mancava
 travagghiavi notti e ghiornu
 pi vuscarimi la iurnata
 sugnu chinu du dulura
 e la vita quantu è dura
 sugnu un pisu sugnu sulu
 addisiu tantu amuri...





ONOFRIO ALFONZO MIGLIARA

CIURI DI MENNULA

A furganu spuntaru. Chi purtentu!
E li piduzzi abballanu, si 'ntrizzanu li manu,
festa si fa ssu jornu e po' dumani.

Nun trova mai rizzettu
l'occhiu si nun talia;
la malia di stu pettu è nevula chi passae vola via.
E' ala di faidda o palummedda,
è biancu d'ovu o scuma
oppuru nivi chi scinni leggìa.

All'ummira d'antichi culunnati
nascinu spranzi nni tutti l'agnuni.
Cchiossà di quattru luni
di 'ncelu la purtaru.



E' cuntintizza forti chi 'mmirdica,
è ducizza di cubaita a la fera,
o marturana c'agghiorna di matina.

Dopu tant'anni
sentu e risentu ancora
li soni e canti di genti strania
cunnutta a ssi cuntrati,
e la chiara di mennuli ciuruti
'mmorca suspira di paci
nni lu cori.

